



Ceistean agus Freagairtean

Leugh duilleag 21 agus 22 a-rithist.

1. Cò mu dheidhinn a tha Lee agus athair a' trod aig toiseach na sgeulachd?

Inns, nad fhacail fhèin, na beachdan eadar-dhealaichte a th' aig an dithis seo air a' chuspair.

Tha Lee ag iarraidh pàirt a ghabhail ann am farpais Clach, Pàipear, Siosar, a tha gu bhith ann an Alba airson a' chiad turais. Chan eil athair idir deònach a leigeil ann a chionn 's gu bheil e ro òg 's gum feumadh e ùine a ghabhail far na sgoile. Cuideachd, tha athair den bheachd nach e gèam cudromach a th' ann agus gu bheil Lee gòrach a bhith ga chluich. Tha Lee den bheachd gur e ana-ceartas a tha seo seach gun tug athair a bhràthair às an sgoil airson a dhol gu gèam ball-coise. Tha Lee feargach nach eil daoine a' cur luach air a' ghèam aige.

Coimhead air duilleag 22.

2. Carson a sguir teaghlach Lee a chluich Clach, Pàipear, Siosar còmhla ris?

Bhiodh Lee daonnan a' cleachdadh a' ghèam mar dhòigh air tighinn gu co-dhùnaidhean.

Bhiodh Lee an-còmhnaidh a' buannachadh a' ghèam, agus mar sin, dh'fhàs càch sgìth de seo agus sguir iad a chluich còmhla ris.

Coimhead air duilleag 23.

3. Carson a bha Lee den bheachd gur e prìosan a bh' anns an eilean?

Bha a bhith a' fuireach air eilean a' cur bacadh air bho bhith gabhail compàirt anns

a' ghèam Clach, Pàipear, Siosar nuair a bha an fharpais air tìr-mòr. Cha robh ùidh aig duine sam bith eile san eilean sa ghèam seo agus mar sin, cha robh an cothrom aige cluich an aghaidh dhaoine eile mar a thogradh e. Bhiodh a' chlann eile san sgìre aige a' magadh air a chionn 's gun robh e cho dèidheil air a' ghèam seo.

Coimhead air duilleag 24

4. Dè bu choireach gun do chaill Lee ùidh ann an Clach, Pàipear, Siosar?

Chuala Lee gun do bhuannaich nighean à Dùn Èideann a bha còig bliadhna deug an fharpais Clach, Pàipear, Siosar. Bha e cinnteach gun robh esan air an gnothach a dhèanamh oirre nam biodh e air an cothrom fhaighinn a dhol chun na farpais. Bha Lee a' fàs feargach gach turas a smaoinicheadh e mu dheidhinn, agus mar sin, cho-dhùin e nach cluicheadh e an gèam tuilleadh.

Coimhead air duilleag 25.

5. Carson nach biodh Lee a' bruidhinn nuair a choinnicheadh e ri daoine às ùr?

B' àbhaist dha a bhith a' cluich Clach, Pàipear, Siosar nuair a choinnicheadh e ri daoine airson a' chiad uair. A-nis, seach nach robh e a' cluich a' ghèam seo tuilleadh, cha robh sìon aige ri ràdh riutha.

6. Dè thug air an sgoil fònadh gu pàrantan Lee?

Bha Lee ann an trioblaid anns an sgoil a chionn 's gun do rinn e cron air balach eile. Bha am balach eile a' fanaid air Lee agus ag èigheachd 'scissorhands' air. Cha leigeadh am balach eile idir le Lee coiseachd air falbh agus chùm e air a' fanaid. Dh'fhàs Lee feargach, agus rug e air a' bhalach eile, lùb e a chorragan air ais agus agus stob e iad suas a shròin cho fada 's a rachadh iad agus nach tigeadh iad às agus b' fheudar dhan bhalach a dhol dhan ospadal.

Coimhead air duilleag 26.

7 (a) Dè tha sònraichte mun t-seantans, "Cha tuirt e càil."?

Tha an seantans uabhasach goirid agus tha e ann am paragraf leis fhèin.

(b) Carson a tha seo èifeachdach?

Tha seo èifeachdach a chionn 's gu bheil e a' glacadh aire an leughadair.

Tha am paragraf a' nochdadh nuair a tha màthair Lee ga cheasnachadh mu na faireachdainnean aige. Tha Lee ga fhaighinn uabhasach doirbh bruidhinn ri daoine – gu h-àraid on a sguir e a chluich Clach, Pàipear, Siosar – agus tha seo air a dhaingneachadh leis gu bheil na briathran a' nochdadh ann am paragraf air leth.

Coimhead air duilleag 27.**8. Carson a tha Lee a-nis a' faireachdainn air chall nuair nach eil e a' cluich Clach, Pàipear, Siosar?**

Bha an gèam na chuideachadh do Lee nuair a choinnicheadh e ri daoine às ùr. Seach gun robh e air sguir ga chluich, cha robh fhios aige dè dhèanadh e no dè chanadh e agus mar sin chan eil e ag ràdh sìon.

9. Carson a tha Lee a' creidsinn nach e dìreach crannchur a tha sa ghèam Clach, Pàipear, Siosar?

Tha Lee den bheachd gu bheil an gèam seo ag innse rudeigin dha mu nàdar agus mu faireachdainnean an neach còmhla ris am biodh e a' cluich.

Tha e ag ràdh gu bheil gach rud, clach, pàipear agus siosar, a' ciallachadh rudeigin sònraichte agus gu bheil am fear a thaghas tu ag innse rudeigin mu do dheidhinn.

Tha an gèam cudromach do Lee a chionn 's gur e sin an dòigh anns a bheil esan a' faighinn tuigse air faireachdainnean dhaoine eile.

10. Dè mhothaich Lee mu na rudan a bhios athair agus a màthair a' taghadh nuair a bhios iad a' cluich Clach, Pàipear, Siosar?

Bidh athair an-còmhnaidh a' taghadh clach agus, ann am beachd Lee, tha seo a' samhlachadh neart agus ag innse rudeigin dha mu athair. Tha e a' mothachadh gum bi a màthair a' taghadh rudan diofraichte gach turas. Tha seo ag innse do Lee mar a tha i a' faireachdainn aig an àm sin fhèin.

Coimhead air duilleag 28.

- 11. Aig deireadh na sgeulachd, ciamar a tha e follaiseach gu bheil truas aig a mhàthair ri Lee, gu bheil barrachd tuigse aice air a-nis agus gu bheil barrachd spèis aice don ghèam Clach, Pàipear, Siosar?**

Tha e soilleir gu bheil i a' faireachdainn truas dha oir tha i a' sìneadh a-mach a làimh agus ga cur air gualainn Lee. Tha i ga mhisneachadh cumail a' dol le Clach, Pàipear, Siosar a chionn 's gu bheil i a-nis a' tuigsinn carson a tha an gèam cho cudromach dha. Tha i a' dearbhadh gu bheil spèis aice dhan ghèam a-rithist oir tha i a' tabhann gèam a chluich còmhla ris.